

quos preterfluens alluit Albula, qui licet maioribus fluviis quantitate non certet, multis eorum tamen multipliciter approbanda qualitate precellit, et non parva solatia privati nominis utilitatis dignitate conquirat. Nam et potui salubris et dulcis sapore, colore puriore vitro et lucidiore cristellis (sic) emanat; expolitis arte nature stratus arenulis et imitantibus margaritas, piscium varios et innumerabiles in linea castra ducens exercitus, et aptus est ad nobilem milicias avium exercendas. Cuius irrigatione dulciflua vernat graminea late mollicies, et iacentem planiciem adusque margines alvei, stellata floribus pratorum purpura gratanter exornans, desuper eminentibus blanditur fenestris, arridet oculis, et ad amorifluas aurore lacrimas et matutinos rores animos allicit alacres, seu post delicias vespertinas coros lascivie iuvenilis invitat. Silva vero duobus brachiis circumplexa castellum, non minus oblectationis habet concentu volucrum, frondis umbraculo, floris aspectu, quam utilitatis copia venationum, ubertate fructuum, administratione lignorum, seu munimenti, comploso et illaqueato robore vel divaricatis arborum ramis contra violentiam hostilis incursus.

Hic est loci situs in quo sum positus; post gaudia quamvis minus sapienter, tamen decenter, et si parum utiliter, pulcre satis exhibite mee me solempnitatis accepit hec sedes, hic me post multa adversa et diversa naufragia portus exceptit.

Hic mea ter quinos exegit mansio menses,

Alternique michi preteriere dies.

Ocia nunc studiis, levibus nunc seria ludis,

Dulcibus utilia nunc variare placet;

5 Nunc michi scripture triplices penetrare recessus,

Nunc memori historias mente tenere vacat,

Nunc michi cum canibus nemorum per operta vagari,

Ludere camporum nunc per aperta libet.

In nemus ire iuvat: posito mox scemate, cultu

10 Induor, officio conveniente suo.

Splendida tunc ocreas choibent calcaria molles,

Quas revocans macerat officiosa manus.

Cornipedem insilio, cornu clangente frementem:

Gaudet et applaudit turba canora canum.

15 Copulat ars binos, pariterque silencia cunctis

Indicens, silvis abstinuisse docet.

Docior explorat vestigia nare sagaci,

Indicium loro, non faciente sono.

Non vereor preceps nemorosas frangere valles,

20 Ardua seu celerem per iuga ferre pedem.

Me modo ramosa silvam precingere zona,

Me videas humeris recia ferre meis,

Nunc lentos arcus et spicula certa ferentem,